

國醫小叢書之二十四

痧疫指迷

費養莊輯

上海國醫書局印行

中華民國十九年十月出版

國醫小叢書之二十四

痧疫指迷

全書一冊定價一角

版權所有 禁止翻印

著者 雲間費養莊

校正者 雲間李啓賢

出版者 上海國醫書局

山東路十三號

發行者 上海中醫書局

嘉義西門街

代售者 台灣蘭記書局

痧疫指迷

雲間費養莊選輯

急救溯原

時行霍亂。及痧脹溫疫諸病。其最關緊急。判死生於頃刻之間者。莫如閉痧。而救閉之藥。非倉猝所可辦。故欲製丸散以濟世急者。莫如先備開閉之藥。但閉症有寒熱二種。勢同冰炭。倘以熱治熱。以寒治寒。則是助邪爲虐。害必更烈。讀近日外間所送痧藥丸藥諸方。雖皆屬有驗之陳方。而藥味則率多燥烈。施之風餐露宿。受寒濕爲病者。

固頗合宜。若施於感暑燥熱而成者。則大相悖謬。而今年夏暑太酷。加以亢旱不雨。秋燥又甚。其爲病也。寒濕當少。燥暑必多。苟寒熱不分。但以一種燥烈之藥。混同概治。恐非徒無益。而又害之矣。惟是患病之家。既不能識寒熱之情形。而送藥者。又不能深諳醫藥。况博施濟衆之事。又焉能盡人人而問之。誠恐功不補過矣。豈送藥之本心哉。鄙人之意。不若製寒熱通用之藥。以濟世急。惟太乙紫金丹一方。薛一瓢稱其比蘇合丸而不熱。較至寶丹而不涼。兼玉樞丹之解毒。備二方之開閉。洵濟生之仙品。立八百功之上藥。足可內服。又有飛龍奪命丹一方。王夢隱稱其芳香辟穢。化毒祛邪。宣氣通營。尤妙在

人中白一味。駕輕就熟爲使。迅掃濁邪。下趨濁道。有馬到成功之捷。其全體大用。有斬關奪隘之功。而具起死回生之力。足可外吹二方藥味。不熱不寒。寒症熱症。均可通用。實爲兩便。急宜修合。以濟急需。博愛好善之士。能選料預製。而廣傳之。其利溥矣。

按市售痧藥者。莫若揀選道地藥品。依法預製。四方丹藥。以備應急。固可濟世。又能銷售。豈非雙方並進。有利無害之善舉哉。然較之痧氣丸。功用大相逕庭。痧氣丸中。茅朮雄黃。冰麝蟾酥等。僅治寒濕受病。而暑熱症用之。是抱薪救火。往往悞事。以上四方。寒熱皆宜。今特揭出。以廣其傳播云爾。

辨證要訣

嘗稽寒閉熱閉二症。以紫金飛龍二丹。相通應用。可無貽害。惟更有慮者。閉症與脫症。每每相似。苟係脫症。而與以閉症之藥。則又速其死矣。醫者臨證。務要確切。辨明形症。然後用之。若遇索藥之人。尤當問明病原與之。庶不致悞。茲列形狀於左。

閉症形象。手指麻木。神迷似昏。爪色或板或青。心胸或煩或痞。其劇者四肢如冰。兩手無脈。神情躁亂。口噤難言。面色或紫漲。或灰垢而呆。腹中或脹或痛。顛倒不安而悶。或唇口爪甲皆青。手面皆黑。甚則神昏不省。其脫症形象。亦往往大略相同。但脫症汗多。閉

症汗少。閉症神識多於迷蒙。脫症神識多於清爽。閉症小便短澀。赤黃。脫症小便清長不熱。脫症舌胎多於宣潤而和。閉症舌胎不。拘或黃或白。必粘膩渾濁。閉症之脈。忽然便無。脫症之脈。漸次而絕。以此數款辨之。似可無所逃情。

按此篇是辨症絕大之關鍵。死生之出入也。要在細心體認。庶免貽悞之憾。至於閉症與脫症。與尋常霍亂有間。又不可不知也。然辨別之訣。宜研究於初候。自無惑焉。若初起。纔覺吐瀉。但見手脚作麻。胸口滿悶。頭目昏蒙。面色或灰垢或紫漲。兩眼白睛泛紅。更問其先覺神氣如蒙。渾渾然如處雲霧者。便是時行霍亂。蓋感受

穢濁時氣也。如無自覺神氣如蒙。若雲若霧。面色紫漲。手足心如烙等症。便是尋常霍亂也。

急救閉症方（寒閉熱閉均可通用。此下三方用以救急。）

太乙紫金丹

治霍亂痧脹。時氣溫疫。嵐障中惡。暑濕溫疫之邪。瀰漫熏蒸。神明昏亂諸症。

山慈菇二兩 川文蛤二兩 紅芽大戟一兩五錢 安息香一兩五錢 蘇合油一兩五錢 千金霜一兩 血琥珀五錢 上

梅片三錢 當門子三錢 白檀香一兩五錢 明雄黃飛淨五

錢

十一味共研極細末。研勻濃糯米飲杵丸如菉豆大。外以飛真金爲衣。每服錢許。涼開水下。孕婦忌服。

此方藥料甚貴。有力者能合全料更妙。否則合半料。或合十分之一。均量力而行可也。蓋此種閉症不多。俟送完接續再合。亦無不可。

飛龍奪命丹

治感受溫暑障疫。穢惡陰晦諸邪。霍亂轉筋痧脹疔痛。腹中急

痛也。心腹悶塞。煩躁顛倒不安。手面遍身青黑。四肢冰冷。兩手無脈。脅亂昏狂。神昏危急。及時症逆傳神迷狂譫。機竅閉塞諸症。硃砂飛二錢。西牛黃二分。當門子三分。眞珠三分。人中白漂煨八分。明雄黃飛一分。杜蟾酥一分五厘。蓬砂三分。梅冰四分。明礬五分。燈心炭一錢。火硝一分五厘。牙皂三分。麻黃去節四分。青黛飛五分。飛眞金三十頁。十六味各研極細末。合研勻。瓷餅緊收。毋令泄氣。以少許吹鼻取嚏。重者再用涼開水調服一分。小兒減半。孕婦忌服。凡遇神昏不省。或雖省而自覺如蒙如霧。渾渾不清。兩手忽然無

脈。肢冷無汗。小便短澀赤黃。舌胎不拘何色。必粘膩渾濁。再兼見上條方下所註症候者。均宜急與此丹。

如遇神氣清爽。自汗甚多。小便清長不熱。舌胎宣潤而和。兩手脈逐漸細小。非忽然便無者。便是脫症。切不可再與此丹。切囑。

速效丹

治諸痧手足麻木。牙關緊急。目閉不語。胸背有紅點。或咽腫心痛。及風餐露宿。寒暑雜感。危急之症。

北細辛三錢五分 枯礬一錢五分 貫衆二錢 製半夏二錢
白芷一錢 牙皂三錢五分 陳皮二錢 薄荷葉二錢 防風

二錢 廣木香二錢 硃砂二錢五分 甘草二錢 桔梗二錢
十三味共研細末。瓷餅緊裝。毋令泄氣。每用三分。吹入鼻孔。寒濕
內盛而病重者。開水調服一錢。

孕婦有忌服紫金丹。奪命丹者。則以此速效丹代之。

按此方卽道光元年治麻脚瘟之方。載在瘟疫彙編。其藥計十五
味。照此方多降香藿香雄黃三味。少廣木香一味。今世施送改名
雷擊散。如合此方。卽將明雄等三味補入。亦無不可。

此方價值甚廉。功效亦著。施之風餐露宿之人。感穢濁惡氣而爲
痧脹霍亂諸病。氣機閉塞者。亦頗合宜。不妨多爲修合。以補四鄉。

廣送也。

定亂丸（此方用以祛病）

治伏暑霍亂。及時行溫熱疫癘。諸般霍亂初起。纔覺手脚作麻。胸
口滿悶。頭目昏眩。神氣如蒙若雲若霧。隨即吐瀉交作。便宜服之。
並治感冒穢濁邪氣寒熱痧脹（痧症脹症俱有寒熱二種）及
寒暑雜感。伏暑化疫等症。

香薷一錢 澤瀉二錢 眞廣木香四分磨入 廣陳皮一錢

小川連五分 白檀香四分磨入 紫蘇梗八分磨入 生香附

二錢 白茯苓三錢 上朴五分 炒山梔二錢 江西香豉四

錢 甜白朮一錢五分 白朮豆一錢 生甘草二錢五分 眞

廣藿香二錢

照方配十劑。或五劑。研細末。水法爲丸。每服三錢。用眞廣藿香二錢。眞陳皮一錢五分。煎湯送下。

如舌黃心煩者。加益元散三錢。晚蠶沙四五錢同煎。如胸悶氣塞者。加苦桔梗二錢。枇杷葉（去毛）三錢。蟬退二錢同煎。如腹痛者。加石菖蒲八分。白蔻仁五分。省頭草二錢同煎。腹脹者。加水炒川厚朴五分。大腹皮二錢同煎。夾受水毒者。加貫衆三錢同煎。以上數方。閉症可用。脫症切不可用。而閉症與脫症。形象往往相

似。不可不慎思而明辨之。

治時行霍亂簡便章程

痧症有寒熱二種。霍亂有風寒暑濕。溫熱疫癘數種。至於吐利腹痛。似霍亂而非真霍亂者。則其種類尤多。令人一見吐瀉。先事驚慌。針刺亂施。痧藥亂服。不但無濟。恐反悞事。故特將是否此症形狀開明。遇此病者。照單對證。用法開列於後。

一。纔覺吐瀉。但見手脚作麻。胸口滿悶。頭目昏蒙。面色或灰垢。或紫漲。兩眼白睛泛紅。更問其自覺神氣如蒙。若雲若霧者。便是感受穢濁時氣。或成痧症。或成霍亂。急宜內外兩治。再解散病人頭

髮細看。如有赤色者。卽拔去之。再脫其衣。細看胸背。如有長毛數莖。必盡拔之。此熱毒深入營分也。

一外用皂角末。或通關散。或痧藥吹鼻取嚏。（卽紅靈丹塘西丸）

一取嚏不問有無。隨繼以刮。凡肩頸脊背胸前。脇肋兩肘灣。兩膝灣等處。皆宜用磁碗口。或厚邊青銅錢。蘸菜油自上向下刮之。以紅紫色綻方止。景岳云。凡毒深病急者。非刮背不可以。五臟之系。前附於背也。（按五臟六腑皆繫於背。刮法誠解毒散邪之捷法。咸哲用之屢效。）

一刮後繼之以刺。今世針法失傳。凡須放痧者。往往取材於脩髮匠。

多不知穴道在何地方。但孟浪下針。以多爲貴。實屬有損無益。不若用刮法爲妙。惟少商尺澤曲池委中四處。自家人亦可會。謹開部位於右。

少商（在手大指頭內側。去爪甲角如韭葉）尺澤（在兩肘灣約文中。）曲池（在肘外輔骨。屈肘曲骨之中。）委中（在兩膝灣。

按此四穴。乃痧疫轉危爲安之捷徑。

刮後凡見有紅筋紫梗起。或露出紅點。卽用銀鍼輕輕刺破。擠出惡血。